

**Penggunaan Bahasa Malaysia dalam bidang Sains Tanah di Universiti
Pertanian Malaysia**

**ROSENANI, A.B., S. ZAUYAH dan WAN Sulaiman W. Harun, Jabatan Sains
Tanah, U.P.M.**

*Sains Tanah, salah satu bidang geosains adalah kursus teras dalam
program Diploma dan Bachelo Sains Pertanian di Universiti Pertanian*

Malaysia. Penggunaan Bahasa Malaysia dalam bidang ini dari segi pengajaran dan penulisan telah dilaksanakan secara berperingkat.

Dalam pengajaran, penggunaan Bahasa Malaysia telah dimulakan untuk program-program Diploma dari awal tahun tujuh puluhan lagi. Untuk program-program Bachelor Sains Pertanian, penggunaan Bahasa Malaysia mula digalakkan pada akhir tujuh puluhan setelah istilah-istilah Sains Tanah diusahakan oleh Jawatankuasa Istilah Fakulti Pertanian, Jawatankuasa Istilah Pertanian (Dewan Bahasa dan Pustaka), Jawatankuasa Kecil Istilah Jabatan Sains Tanah dan pakar-pakar dalam projek penyediaan Istilah Sains Tanah (Dewan Bahasa dan Pustaka). Sungguhpun pensyarah-pensyarah dan penuntut-penuntut mendapati masalah dalam penggunaan Bahasa Malaysia oleh sebab ketakselarasan istilah dan kerap kali ketiadaan istilah, Bahasa Malaysia terus digunakan. Sehingga hari ini boleh dikatakan sembilan puluh peratus dari kursus-kursus Sains Tanah adalah dalam Bahasa Malaysia.

Dari segi penulisan terutama buku teks, bidang Sains Tanah masih lagi berkurangan, walaupun dua buah buku asas telah diterbitkan. Pada masa ini ramai pensyarah Jabatan Sains Tanah sedang menyediakan buku-buku teks secara individu atau berkelompok tetapi pengeluaran buku-buku ini tetap mengambil masa yang lama. Sungguhpun demikian penulisan bukan hanya tertumpu pada buku teks tetapi laporan-laporan penyelidikan kertas projek tahun keempat, kertas-kertas kerja, serta buku-buku panduan analisis telah ditulis dalam Bahasa Malaysia.
